



Vuk'uzenzele

IMAHHALA

Uyetyulelwa Tekuchumana Tahulumende Nekuniketa Lwati (GCIS)

Siswati/English

Inkhwekhweti 2015



Letivela e-Union Buildings

Likhasi 3



Hulumende ulwa ne-TB

Likhasi 5



Luhlelo lwekwa-kha lolusha luvula imisebenti

Likhasi 8

Kwenta kancono hulumente wasekhaya

Ongezwa Manyathi

Ngemuva kweminyaka le-15 yahulumende wasekhaya, bantfu baseNingizimu Afrika batfola tinsita letincono njengemanti, kutfutwa kwendle nekungcola kanye nagezi.

Kwakhiwa kwetindlu sekuvete imango lenemlandla lenetisetjentiswa letifana netinkhulisa, imitfolamphilo netikolwa.

Hulumende sewususe imikhukhu kwatsi esikhundleni sayo wakha tindlu letingutonona letinge-500 netinsita letisisekelo kuleminyaka lesihlanu leyendlulile.

“Sesibe nenchubekela embili lebonakalako kusukela kwabakhona inkhululeko, kuphendvula kumyalelo wekutsi kutawuba netindlu, kuvikeleka nekuphila kahle, lokushiwo kuMculu Wenkhululeko,” kusho Mengameli Jacob Zuma.

Bekakhuluma Emhlanganweni Wemalunga Avelonkhe (i-NMA) eNhlango Yabohulumende Basekhaya eNingizimu Afrika (i-Salga) losandza kubanjelwa eMidrand.

I-NMA ngumhlangano wabohulumende basekhaya wekubuketa inchubekela embili leseyentiwe kuhulumende wasekhaya kanye nekutfola tindlela tekucinisa hulumente wasekhaya nekwenza kancono tinsita.



Mengameli Jacob Zuma utsi kusesekunyenti lokudzinga kwentiwa kute kwentiwe timphilo tebantfu baseNingizimu Afrika tibe ncono.

Ingcikitsi yenkhomfa yalomnyaka beyitsi, “Kugubha Umkhosi weminyaka le-15 yaHulumende Wasekhaya Lokhululekile. Kubuyela emuva kusicalonchanti kute kutsi kuhlanganiswe futsi kujuliswe hulumente wasekhaya lotfutufukisako nalogcile kubantfu.”

Mengameli utsite imimango leminyenti seyivele iyayiva inchubekela embili ngekutfola tinsita letisisekelo.

“Kukhishwa kweLuklayo lwanga-2011 kwacinisekisa emagcatsi lamakhulu lasahanjiwe ekuniketeni tinsita letisisekelo. Lokukhuphuka loku kuciniswa ngumbiko wekugcina weluklayo lwabomasipala lolungesilo lwetetimali

lolwakhishwa mhla ti-2 Inyoni 2014,” kwasho yena.

Ngekuya kwalombiko, tinsita letiniketwa bomasipaladi setinciphise buphuya.

Lombiko ukhombisa kutsi emakhaya la-5,3 wetigidzi atfola tinsita letisisekelo tamahhala nekutsi la-11,8 wetigidzi atfola tinsita temanti letisisekelo, latigidzi le-2,5 awo azuza ekusitweni kwalabaphuyile. Emakhaya laphuyile ngulawo lafanele kubuyiselwa nome kwelekelelwa kutfolo tinsita letisisekelo.

Emakhaya latigidzi letilishumi atfutselwa indle nekungcola bomasipaladi eNingizimu Afrika nekutsi futsi lange-31,1% alamakhaya

atfutselwa mahhala indle nekungcola lokusisekelo.

“Nanome nje timphilo letitigidzi setibe ncono ngalokubonakalako, basebanyenti labasalindzile, labasafuna kubona timphilo tabo tintjintja tiba ncono.

Bafuna emanti, gezi, tindlu, imigwaco netikolwa letisezingeni lelifanele letidvute nemakhaya abo,” kwagcizelela Mengameli Zuma.

LOKUHLE LOKUSHIWO NGENINGIZIMU AFRIKA

Mengameli utjele titfunywa kutsi kunyenti lokuhle lokwentekwe eNingizimu Afrika kule-Minyaka Yenkhululeko lenge-20 leyendlulile nekutsi futsi lelive linenzaba lenhle lelingakhuluma ngayo.

“Lena yinzaba yahulumende lonakekelako nalosebenta ngemphumelelo losebente ngalokukhulu kuhlakanipha nekucophelela asebentisa imitfombo lemincane kute ente tingucuko letijulile etimphilweni tebantfu.

“Lena yinzaba yemisebenti lomuhle netikhungo letiphuma embili letakhiwe kulo lonkhe live lakitsi ngebukhulu balo, etifundzeni nakumikhakha yenzawo.”

Mengameli ukhutsate bohulumende basekhaya kutsi basebentisane babelane tifundvo labatifundzile.

“Kunabomasipaladi labasebenta ngemphumelelo, banetichubo tetepolitiki nekuphatsa letisebenta ngemphumelelo, letinetimiso letinemandla tekucwaninga tangekhatshi netekuphatsa timali,” kwasho Mengameli Zuma.

Utsite labomasipaladi balawula ngaloku-

Iyachubeka elikhasini le-2

Kwenta kancono lizinga lemfundvo eNingizimu Afrika

Allison Cooper

Litiko Lemfundvo Lesisekelo (i-DBE) lavelonkhe lisebenta ngekutikhandla kute lente kancono lizinga letemfundvo kulo lonkhe lelive, ikakhulu mayelana netibalo, isayensi nethekhinoloji.

Emhlanganweni wesitsatfu losandza kubakhona weTibalo, Isayensi, neThekhinoloji (i-MST), Indvuna Yemfundvo Lesisekelo Angie Motshekga itsi nanome nje kusesekunyenti lokufanele kutsi kwentiwe kute kwenyuswe linani lebantwana labafundza tifundvo te-MST kanye nelizinga labo lempumelelo kuleti tifundvo

te-MST, kute kungabata kutsi kunyenti lokwentiwe.

LeLitiko selivele lisungule Lumphiko lwe-MST lolusebenta ngalokuphelele futsi lolutimisele, lolubukene neluhlelo lwekutfutufukisa lwe-MST lesevele lendlule ngaphansi kwenchubo yekubuketiswisa.

“Tiyachubeka tihlelo tekuhlanganisa sibonelelo semibandzela seDinaledi netikolwa tetebucwephele kutsi sibe sibonelelo lesisha lesibanti lesihlanganisa konkhe – Sibonelelo Semibandzela se-MST – futsi tingcoco ne-Mgcinimafa setisezingeni lelisetulu,” kwasho yena.

IDinaledi ingumtamo we-DBE logcile kakhulu kutibalo nesayensi.

Kwengeta, i-DBE seyiyalele Ilabhorethri Yemiphumela Lesheshako Lemikhulu ye-MST kutsi ihlele lisu lesikhatsi lesidze lekutfufukisa lwati lwabothishela lwalwetifundvo.

“Ilabhorethri ye-MST itawusungula tindlela tekukhutsata kuhlanganeyela lokukhulu kwe-

bafundzi futsi itawuphindze iphetse luhlelo lwemkhakha loludzingekako kusivini sempumelelo lendlondlobele nalehlelekile,” kwasho Indvuna Motshekga.

KUBUKANA NALETINSAYEYA

Indvuna neLisekela Lendvuna Enver Surty baphakamise tinsayeya letinyenti mayelana nale-MST kuluhlelo lwamabonakudze lwasekuseni lwe-The New Age lolusandza kubanjwa. Letinsayeya tifaka ekhatsi kunika bothishela tinsitakufundzisa, kwengeta bothishela, kubalandzelela kanye nekubasekela.

Letinsayeya tikhonjwe Litsimba Lekusebenta Letindvuna lelibukene ne-MST.

LeLitsimba liphindze latfola kutsi tifundza tite tihlelo letenele letihleliwe tekwesekela nome kusebentisana nemkhakha lotimele nome tihlangano letingekho ngaphansi kwahulumende (ema-NGO).

“Loku-ke kuvamise kutsi kugcwele ema-NGO etikolweni, kepha kubandzakanyekeka



Indvuna Yetemfundvo Lesisekelo Angie Motshekga.

Iyachubeka elikhasini le-4

LOKUNGEKHATSI

Tisombululo letinsha tahulumende wasekhaya losebenta ngemphumelelo

Ongezwa Manyathi

Indvuna Yetekubusa Ngekubambisana Netendzabuko Pravin Gordhan ucele titfunywa letingenele Umhlangano Wemalunga Wavelonkhe (i-NMA) eNhlango Yabohulumende Basekhaya eNingizimu Afrika (i-Salga) kutsi tente lokunyenti ngalokuncane.

Enkhulumeni yakhe ku-NMA lesandza kubanjelwa eMidrand, Indvuna itsite: "Sinemikhawulo yemali eNingizimu Afrika. Umbuto utsi ukwentanani lokunyenti ngalokuncane kuleminyaka lembalwa letako, ngokuphela lotawukuva."

INingizimu Afrika, njengawo wonkhe umhlaba, ibukene netinsayeya letimatima temnotfo. Loku kusho kutsi hulumente wonkhe kanye nahulumende wasekhaya ikakhulu, ufanele kutsi aletse tisombululo letinsha tekuniketa imimango tinsita.

Emitameni yekukhutsa bomasipala kutsi bacabange basebentise imibono lemisha hhayi lemidzala leyetayelekile, labemelele bomasipala labambalwa babelene ngetisombululo tabo letinsha nebalngani babo ku-Salga NMA.

"Lokusha kubaluleke kakhulu ekubukaneni netinsayeya kuhulumende

wasekhaya. Sisive lesicambako lesinemi-bono leminyenti lemisha levela etindzaweni tasemaphandlani kakhulu talelive," kwasho Umphatsi Lomkhulu (i-CEO) weSikhungo Setinsita Tahulumende Letinsha (i-CPSI) eNingizimu Afrika, Thuli Radebe.

Utsite yonkhe minyaka lelive libona lokuticambela kuMiklomelo ye-CPSI, lapho khona linani lelikhulu lelihlosiwe labaphumelele levela kuhulumende wasekhaya.

TINDLELA LETINSHA TISONDZETA TINSITA DVUTE NEBANTFU

Linyenti labomasipaladi kulo lonkhe lelive basebentisa tindlela letinsha kuniketa imimango yabo tinsita. Lomunye walabomasipala labanjalo luphiko lwaMasipaladi wase-eThekweni Lwemanti Nekutfutwa Kwendle (i-EWS).

Luphiko lwe-EWS lulawula emanti neku-tfutwa kwendle nemanti ngekhatshi kwa-Masipaladi wase-eThekweni futsi sewe-bente, emkhatsini walokunye, ne-Bill and Melinda Gates Foundation, kanye neLibhange Lemhlaba.

Nga-2014, loluphiko lwatfolwa Umklomelo wanga-2014 we-Stockholm Industry Water "Njengeluphiko lolusebentisa tindlela letinsha lelinenchubekela embili eNingizimu Afrika". Umeleli weluphiko lwe-EWS, Dave Wilson, ubeke emabalengwe ekusetjentiswa lokuntjintjiwe kwemakhontena ekuhambisa tintfo ngemikhumbi njengemabhlokhi emithoyi yemango kusombulula insayeya yekutfutwa kwendle etindzaweni tasemikhukhwini.

Lemithoyi yabomahamba nendlwana yemakhontena izuzisa imikhukhu lenge-600.

"Letindzawo tekuhlala leti setikhonjwe ngumasipaladi njetindzawo tekuhlala letitawutfutukiswa ngekutsi kwakhiwe tindlu letihlelekile kuto," kwasho Wilson.

Kute kube ngumanje sekwakhiwe tindzawo tekugezela letinemithoyi le-1 100 etindzaweni letinge-600 kuyo yonkhe indzawo yase-eThekweni, futsi indzawo yekugezela ngayinye isetjentiswa mikhukhu lecishe ibe nge-50 endzaweni

lenebubanti lobungemamitha lange-200.

"Masipaladi ucashe bantfu labanakekela letindzawo netisebenti letitawuba bachumanisi labanakekela letindzawo, futsi emaphepha asemthoyi nensipho kuniketwa luphiko," kwasho Wilson.

Ngaphandle kwekuvula imisebenti nekuvusa emabhizinisi lamancane, lomklamo ubuye futsi uvikele temphilo yemimango yendzawo.

Lidolobha lelikhulu laseTshwane lingu-lomunye masipaladi losebentisa tindlela letinsha tekwenta timphilo tebantfu tibe ncono ngekusebentisa umtamo wakhe wethekhnikoloji yedijithali lebitwa ngekutsi pheceleti Project Isizwe.

I-Project Isizwe kute kube ngumanje seyikhiphe tindzawo te-Wi-Fi letinge-600, lesetjentiswa bantfu labangetulu kwegtidzi letimbili. Ngekuya kwalomasipaladi, bantfu labalinganiselwa kulabatigidi letintsatfu batawutfolwa i-Wi-Fi yamahhala ekupheleni kwa-2015.

"Kuchunywa ku-inthanethi kufanele kutsi kutsatfwe njengekwetfulwa kwetinsita lokusisekelo. Bantfu sebantfu labasha, lokusho kona-ke kutsi hulumente udzinga kutsi ahambisane netikhatsi, ikakhulu mayelana nebantfu labasha," kwasho Umphatsidolobha Lomkhulu wase Tshwane, Kgosientso Ramokgopa.

NgeLweti emnyakeni lophelile, Lidolobha lelikhulu letfula i-Tshwane Wi-FiTV, lokwafinyelela kubukelwa linani lebantfu labasigidi lebelimisiwe nakusuka Indlovana kulomnyaka.

I-Tshwane Wi-FiTV inetihloko letifana nemculo, tindzaba letisematseni, temabhizinisi, tenkholo, imisebenti netemidlalo.

"Bakhi bemafilimu e-Wi-Fi baloku bebakadze babantfu labebangasebenti phambilini nome bebangakacashwa ngekuya kwemakhono abo," kwasho Ramokgopa.

Lolunye luhlelo lolusha lolwetfulwe nguLidolobha lelikhulu yi-DigiMbizo, luhlobo lwetimbizo lwedijithali letibanjwa nguhulumende wavelonkhe kulo lonkhe lelive kute achumane nemimango babu-



Luphiko Lwemanti Nekutfutwa Kwendle laMasipala wase-eThekweni lisebentisa emakhontena kubukana naletinselele tekutfutwa kwendle nekungcola emikhukhwini kulesifundza.

kana buso nebuso.

"I-DigiMbizo yenta imimango yase-Tshwane kutsi ibambe Imbizo nemphatsidolobha bangebekele emakhaya abo," kwasho Ramokgopa.

Emalunga emmango ayakhona kusebentisa i-Twitter kutfumela imibuto nome lokubakhatsatako kuMphatsidolobha basebentisa i-hashtag #DigiMbizo nome #AskRamokgopa futsi utfole imphendvulo masinyane.

Ngekusebentisa le-DigiMbizo, masipala uyakhona kufinyelela emacembu etenhlalo langavami kuhlalanyela etinkhundleni letetayelekile, kwachaza Ramokgopa.

"Kuphindze futsi kusisite kutsi silandzele luvo lwemango nekwenza kancono sivinini sekusombulula tinkinga."

Ichubeka isukela elikhasini le-1

hlobile lapho khona tisebenti tibeka embili kuvimba inkhohlakalo nekulawula timo letingaba yingoti.

Labomasipaladi, kwasho Mengameli, baphindze futsi bangakubeketeli nakancane kungasebenti ngelizinga lelifanele, futsi bahlala njalo babuketa lizinga lekusebenta baphumelelisa netinyatselo tekulungisa lapho kudzingeka khona.

"Loku kufanele kutsi kwentiwe ngibo bonkhe bomasipaladi, ngobe hulumente wasekhaya ukhona kute kutsi asebentele bantfu. Leli liphuzu lelibalulekile."

Uhalalisele bonkhe bomasipaladi labente umehluko ekugculeni timphilo tebantfu.

"Umsebenti wenu uyabonwa futsi uya-
tfokotela," kwasho yena.

Mengameli umema titfunywa kutsi tente kancono futsi tisebente ngekutikhandla kute tente iNingizimu Afrika kutsi ibe yindzawo lencono yawonkhe wonkhe.

"Sifanele kutsi sente kancono ekuphuculeni tinsita letifanana netakhiwonchani temanti, kulawulwa kwenkhukhuma lecinile nome kuphakelwa kwagezi.

"Leti tinsita letilula letisisekelo, lekutsi natiphakelwe ngemphumelelo, titawenta bantfu bahlangabetane nalokuhle lokujabulisanako lokuvula kuhulumende wendzawo."

KWENTA HULUMENDE WASEKHAYA ASEBENTE NGE-BUNGCWETI

Kute kutsi hulumente wasekhaya asombulule letinye tetinselele labukene nato, udzinga kuphatfwa bantfu labatingcweti futsi labaneticu letifanele.

Ngekuya kwaMengameli Zuma, hulumente sewuphendvulile mayelana nekwenza kancono bungcweti nekuphatfwa kwabohulumende basekhaya ngekwenza tichibiyelo emtsetfweni wahulumende wasekhaya njengeMtsetfo Wekuchibiyela Inchubo yaMasipala.

"Akukafaneli kutsi kucekiswe kucinisekisa

kutsi tisebenti tinemakhono lamancane ladzingekako," kwasho yena.

Mengameli utsite tikhulu tetetimali, bonjinela naletinye tisebenti tetebucwephelele tifanele kutsi tibe nemakhono futsi babe tingcweti emisebenti yabo.

I-Salga seyente imitamano ekwenteni kancono buholi nekucinisekisa kutsi kunemakhono lafanele kuhulumende wasekhaya ngekutfula tinhlelo letentelwe ngoko kufundzisa, kusita emakhansela kutsi avisise kancono tindzima tawo latidlalako netibopho.

Ngekuya kwaSihlalo we-Salga, Thabo Manyoni, lenhlango seyiphumelelise kahle Luhlelo Lolukhulu Lwekutfutukisa Baholi.

KUBUYELA EMUVA KUSICALONCHANTI

Kungcungcutsela Yabomasipala neLihovisi LaMengameli, nayo lebeyibanjelwe eMidrand, ngeNyoni 2014, tikhulu tahulumende wasekhaya tavumelana ngalinye kutsi ababuyele kusicalonchanti kunikwe imimango tinsita letisezingeni lelifanele.

Loluhlelo lweKubuyela Kusicalonchanti luhlose kwakha bomasipala labaphendvulako, labanakekelako nalabatilanzako.

"Sitinikele ekwenteni siciniseko sekutsi bomasipala bayakwati kuniketa emanti, gezi, tindzawo tekungebeleka, emalambu ekukhanyisa etitaladini, kubutsa inkhukhuma, kulungisa imigodzi emigwacweni, kubukana nekuphatamiseka kwetinsita lokukhungatsekisanako netinkinga tekukhishwa kwetitatimende letingenamaphutsa tetikweleti tetitsinta tahulumende," wakhumbuta ematsimba.

Utsite bomasipala nabo bafanele kutsi bachumane ngalokucacile futsi babikele imimango labayisebentelako.

"Kubuyela kusicalonchanti kusho kubuketa inchubo yekuniketa emathenda nekubukana nenkhohlakalo ngalokuhlelekile ngekhatshi kunchubo yekutsenga nekutfolwa tinsita kuhulumende wasekhaya."

Mengameli utsite bomasipala bafanele kutsi basebente ngekutikhandla kute bengete

tinhlelo tekucedza buphuya njengeLuhlelo Lwemisebenti Yemango, loluniketa ematfuba emisebenti nemakhono.

"Luhlelo lweKubuyela kusicalonchanti lukhutsata bomasipaladi kutsi bente kancono kutfutuka kwetindzawo tasemaphandlani ngekwesekela emabhizinisi lamancane, emakoporasi, nebalimi labancane emadolobheni nasetigodzini tasemaphandlani."

Ucele titfunywa kutsi titinikele kabusha ekusebenteni ngekutikhandla nangemphumelelo kuyo yonkhe yomitsatfu imikhakha yahulumende.


"Sifanele kutsi sihlale njalo sikhumbula kutsi kulawulwa kahle kwemango akusilo lilungelomusa kulive lelilawulwa ngentsandvo yelinyenti. Lilungelo lelibaluleke kakhulu."

Ugcizelele kutsi yonkhe yomitsatfu imikhakha yahulumende ifanele isebentele kuhlalanyela nalokulindzelwe ngumango mayelana netinsita ngesikhatsi lesifanele dvutane nalapho bahlala khona.

"Tifanele kutsi tetfulwe ngemphumelelo nangalokwenetisako tisebenti tahulumende leticecehiwe."

EMANANI EKWETFULWA KWETINSITA:


• **Lange-95%** – Ngemaphesenti emakhaya lafinyelela emanti elizinga lelisisekelo nga-2012. Loku kukhula kusuka **kulange-60%** nga-1994.



• **Lange-86%** – Ngemaphesenti emakhaya atfolwa gezi nga-2014. Loku kukhula kusuka **kulange-50%** nga-1994.



• **Lange-83%** – Ngemaphesenti emakhaya latfutsetelwa indle ngalokusezingeni lelisisekelo nga-2012 – loku kukhula kusuka **kulange-50%** nga-1995.



• **Tigidzi le-9,1** – linani lemakhaya latfutsetelwa inkhukhuma

njalo nga-2011. Loku kukhula kusuka **ku-6,3 we-tigidzi** nga-2001.



• **73** – linani labomasipala lebelinemakhaya langatulu **kulange-90%** latfolwa gezi. Loku kwenta kancono kwamasi paladi munye lobekane-maphesenti langatulu **kwalange-90%** wemakhaya latfolwa gezi.



• **Lange-72%** – Ngemaphesenti emakhaya latfolwa tinsita tekutfutsetelwa inkhukhuma. Loku kwenta kancono kusuka **kulange-55%** nga-2009.





Letivela e-Union Buildings

Umlayeto lovela kuMengameli

Asibemunye ngekulwisana nekuhlaselwa kwebantfu bekufika

Bantfu bakitsi baseNingizimu Afrika, kamuva nje sibone tehlakalo tebudlova letitfusakako kanye naletingakamukeleki leticondziswe kubantfu basemaveni angaphandle kuletinye tigozi taKwaZulu-Natal, lekutsi seyisakateke kuletinye tigozi taseGauteng. Tehlakalo letifana naleti tenteke eSoweto ngaBhimbidvwane.

Kute kunyanya nobe kutfukutsela lokunokusetjentiswa njengenchazelo yokuhlaselwa kwebantfu basemaveni angaphandle kanye nekugebenga titolo tabo.

Asivumelani nakancane nebudlova. Lokuhlaselwa kwephula kubaluleka loku iNingizimu Afrika inguko, ikakhulu lokuhlonipha timphilo tebantfu, emalungelo eluntfu, tiftunti tebantfu kanye nebuntfu.

Silive asivumelani nakancane nekungavumelani lokufana nelubandlululo ngebuhlanga, lubandlululo lwemave angaphandle, lubandlululo lwebantfu laba-tsandzanako bebulili bunye kanye nelubandlululo lwebulili.

Sindlulisela emavi endvudvuto kulemindeni yabo bonkhe labashonile siphindze sifisele labo labalimele kutsi balulame masinyane.

Sicela kuthula, kuphela kwalobudlova kanye nekulawuleka. Tigebebu akumele tivunyelwe kusebentisa bantfu kubanga ludlame nebugebengu.

TINKHULUMISWANO
Tinkinga noma ngabe ngutiphi nobe tindzaba tekukhatsata takhamuti taseNingizimu Afrika kumele ticacululwe ngekuthula nangenkhumiswano.

Emaphoyisa atjelwe kutsi asebente ngekutikhandla kute avikele bantfu labachamuka emaveni angaphandle kanye netakhamuti takuleli live nekubopha labo labagebenga titolo tebantfu labachamuka emaveni angaphandle kanye nalabo labanta tento tebudlova.

Sidzinga takhamuti kutsi tise emaphoyisa ngekuwaniketa lwatiso ngethlakalo tebudlova lobucondziswe kubantfu labachamuka emaveni angaphandle letenteka eGauteng naKwaZulu-Natal kute kutsi letigebebu tibanjwe.

Sibonga baholi betenkholo, tinhlango lekungasito tahlumende kanye nalabatsintsekako labaleka lusito lwenhlalakahle kulabantfu labatsintsekile kulobudlova.

Njengoba singavumelani nalokuhlaselwa, sikucaphele, futsi siyativisisa letinye tato letindzaba letiphakanyiswe takhamuti letitsintsekako taseNingizimu Afrika.

Siyaphindza futsi kusho kutsi bantfu baseNingizimu Afrika asibo bantfu lababandlulula ngekwemave. Nangabe

bebangubo, besingeke sibe nebantfu labanyeti labachamuka emaveni angaphandle labatibandzakanye ngemphumelelo emimangweni kulo lonkhe lelive letfu, emadolobheni, emadolobha lamakhulu kanye nasetigodzini.

Leti tindzaba temnotfo nenhlalo letiphakanyisiwe letitawubukwa.

Loku kufaka ekhatsi tikhalo mayelana nalabo labahlala kulelive bangenamadokhumententi langekho emtsetfweni, kungeteka kwenombolo yetitolo nobe emabhizinisi lamancane lawo lekatsetfwe bantfu labachamuka emaveni angaphandle lapho benteka khona lobugebengu.

Sifisa kugcizelela kutsi njengobe labanye bantfu labachamuka emaveni angaphandle baboshelwe tinhlolobhlobo tebugebengu, kuyadukisa futsi akukalungi kucabanga kutsi bonkhe bantfu labachamuka emaveni angaphandle kutsi bafaka sandla kubugebengu balelive.

Kwengeta, akusibo bonkhe bantfu labachamuka emaveni angaphandle labahlala eveni letfu ngalokungekho emtsetfweni.

Labanyenti balapha eveni ngalokusemtsetfweni kanye nekufaka sandla kumnotfo nekutfutukiswa kwetenhlalakahle kwalelive. Labanyeti baleka emakhono langatfolakali lasisita kutfutukisa umnotfo, bemukelekile kuhlala eveni letfu.

Labanye bete eNingizimu Afrika njenge-makhoseli labaleke tingcabano nobe timphi kulamave labachamuka kuwo, njengalendlela bantfu labanyenti baseNingizimu Afrika bahamba kulelive bahlala kulamanye mave kulelivekati nangesheya.

Bebasiphetse ngemusa, ngesitfunti nangenhlonipho ngubobhuti nabosesi betfu bakulelivekati. Ngeke sawukhohlwa lomusa nekubambisana.

Lusito lesalutfola kumave lase-Afrika leseNingizimu lasite kumzabalazo wenkhumuleko kanye nelusito lwenhlango Yebunye be-Afrika bekubalulekile kulempumelelo yenkhumuleko kanye nelulawulo lwentsandvolinyenti lesilijabulelako namuhla.

TIBOPHO

Kuloku, Hulumende utawuchubeka nekuludlala indzima yakhe kanye nekugcwalisa tibophetelo tetfu netibopho njengemalunga eNyonyane yase-Afrika kanye neMhlabuhlangene.

Emakhoseli kanye nalobo labafuna kuvikelwa batawusekelwa ngemtsetfo nemphezothokholi emave emhlaba, ngekwesekelwa Lumphiko LeMakhoseli Lamhlabuhlangene.

Sicela kubantfu bakitsi kutsi basekele baphindze bavikele makhoseli kanye nalobo labafuna kuvikelwa.

Ngiletse Indvuna Yemaphoyisa, Indvuna Yetekuvikeleka Kwembuso kanye Nendvuna Yetasekhaya kutsi tisebente nahulumende Wetifundza waKwaZulu-Natal kucedza lobudlova nekwenza lesimo sibengulesetayelekile. Bente kahle kakhulu kodvwa lenkinga

idzinga kutibandzakanya ngalokugcwele ngalokusimeme kwesikhatsi lesidze.

Nginikete yonkhe Inhlanganisela Yetebulungiswa, Kulwa Nebugebengu kanye Netekuphepha kutsi isebente ngalendzaba kahle, ihlanganyelwa Yindvuna Yetekutfutukiswa Kwetenhlalakahle, Yetekuhwebelana Netetimboni kanye Neyekutfutukiswa Kwemabhizinisi Lamancane.

Lenhlanganisela yetekuphepha kanye nematiko etemnotfo acalile ngekusebente ngalendzaba, kulandzela sehlakalo sebudlova saseSoweto ngaBhimbidvwane.

IMIMANGO

Ngibatjele kutsi basebente masinyane kanye nekubandzakanya imimimango letsintsekako, tinhlango letimele bantfu labachamuka emaveni angaphandle, emabhizinisi, tinhlango lekungasito tahlumende kanye nalabanye labatsintsekako kutsi babukane nalokukhatsateka lokuphakanyiswe tinhlango titoimbili.

Umgomo kugwema tehlakalo telikusasa ngekwenza ncono budlelwano kanye nekukhuphula kuhlalisana ngekuthula emkhatsini kwetakhamuti kanye nabobhuti nabosesi betfu kulelivekati, kanye nalabanye bantfu labachamuka emaveni angaphandle.

Sitawube sifuna kusebentisana kanye nekwesekelwa lokuchamuka emahhovi emancusa latfolakala eNingizimu Afrika. Indvuna Yetasekhaya ihlangene Nemancusa Akulamanye Mave kamuva nje.

Indvuna Yetebudlelwano Nekubambisana Kwemave Emhlaba itsatse letingcoco embili kumihlangano yayo Nemancusa Akulamanye Mave ngeti-17 taMabasa.

Sicela Malunga ePhalamente kutsi asebente natsi, emimangweni yabo, kwenta ncono budlelwano kanye nekukhuphula kuhlalisana ngekuthula emkhatsini kwebantfu betfu kanye nebantfu labachamuka emaveni angaphandle.

Tinyatselo tiyentiwa kuphucula tindlela tekulawula kancono iminyele kanye nemitsetfo lelulawula labatfutsela kulelive.

Kuloku, Hulumende wenta inchubekelembili ngekucala Lumphiko Lwekulawula Umnyele, letawulawula simondzawo semnyele kanye nayo yonkhe iminyele yekungena.

Litiko Letasekhaya litakuhlonyiswa ngemakhono kute likhone kuphatsa ncono tindzaba tebantfu labachamuka emaveni angaphandle ikakhulu eminyeleni.

Kuloku, Umbutfo Wetekuvikeleka waseNingizimu Afrika (i-SANDF) utawuletsa emasotja lange-350 Kulitiko Letasekhaya, kusebente njengetisebenti tebantfu labachamuka emaveni angaphandle eminyeleni.

Kwengeta, i-SANDF iletse emasotja kutsi atawusebentela eminyeleni etifundzeni letisikhombisa kuvimba tento tebugebengu baseminyeleni kanye nekuwela iminyele ngalokungekho emtsetfweni.

Bantfu bakitsi baseNingizimu Afrika, sicela nonkhe kutsi nibe nekuthula nekulawuleka.

Sicela futsi labo labasebentisa tindzaba tekuchumana nge-inthanethi, bayekele kugcugcutela budlova ku-Facebook, ku-Twitter naletinye tindlela.

Sonkhe sinesibopho sekukhuphula kubumbana kutenhlalakahle, kuhlalisana ngekuthula, nebudlelwano lobuhle kulelive.

Bantfu labachamuka emaveni angaphandle basisita sibukeke njengesibonelo lesihle selive lelinebantfu labahlukene futsi siyakutsandza kuba khona kwabo kulelive. Sifuna kubona kungeteka kwetivakashi letichamuka emaveni akulelivekati nekwabelana lokunyenti ngematfuba emabhizinisi njengencye yekukhuphula kutfutukiswa kwennotfo ngalokusimeme kulelivekati.

SONKHE SIMA-AFRIKA

Imikhosi Yenyanga ye-Afrika isiletsela ematfuba kutsi sikhuphulele bungibo be-Afrika embili kanye nebudlelwano lobuhle nabobhuti nabosesi betfu bakulelinye livekati.

Siyibukelele lemikhosi Yelusuku lwe-Afrika kuto tonkhe tifundza mhla ti-25 Inkwekhweti.

Bantfu bakitsi, sicela bonkhe bantfu kutsi behlise imimoya.

Lokuhlaselwa kwebantfu basemaveni angaphandle akukamukeleki kulelive letfu.

Ngesikhatsi silwela inkhumuleko sa-tfola lusito emaveni lahlukahlukene. Labantfu balawomave abazange basicsosha nobe basiphatse kabi.

Sitfole tikhalo tekutsi labanye bantfu labachamuka emaveni angaphandle abanamaphepha ladzingekekako kutsi babe seNingizimu Afrika.

Kwengeta kuletikhalo, takhamuti takitsi tiyakhala ngetento letentiwa ngulabanye bantfu labachamuka emaveni angaphandle futsi bababeka licala lekubatsatsela emabhizinisi nematfuba emisebenti.

Hulumende ulalele tonkhe tikhalo tenu futsi utawutilungisa. Kepha kumele sicinise sincumo setfu sekutsi kute inchazelo yekuchaza loludlame. Asivumelani nalenhlobo yekutiphatsa.

NjengaHulumende, sitsatsa tinyatselo letifanele tekwenza ncono kuvikeleka kanye nekungena eminyeleni yonkhe yalilive kute sicinise kutsi kute umuntfu waseveni langaphandle lota eveni letfu ngalokungekho emtsetfweni. Siletse letinye tikhulu te-SANDF eminyeleni yetfu kute kutsi basite Litiko Letasekhaya ngekucaculula lendzaba.

Asisebentisaneni sonkhe kute sisekele bonkhe bantfu labachamuka emaveni angaphandle labatsintsekile kulobudlova.

I-AFRIKA LENCONO

Umculo Wenkhumuleko utsi kumele kube nekuthula kanye nebungani. Sibopho setfu kukhuphula lelifa lekuphila ngekuthula siphindze silichubekisele embili.

Siphindze futsi sicinise sibopho setfu sekufaka sandla ku-Afrika lencono nemhlaba loncono

Asisebenteni sonkhe kute sente live letfu libe indzawo lencono lelibantfu bangahlala kulo.



TEMFUNDVO

Kuntjintja indlela tikelwa taseNingizimu Afrika letibukeka ngayo



Hulumende wakha tikelwa lapho khona bafundzi batawukhula nabothishela futsi babe nenshisekelo yokufundzisa. Letikelwa titawusita kukhuphula lizinga tibuye futsi takhele kulikusasa lelincono.

Amukelani Chauke

Eminyakeni lemitsatfu leyendlulile hulumente watinikela ekucedzeni tikelwa teludzaka kulelive nekwenza kancono timondzawo tekufundza eNingizimu Afrika.

Eminyakeni lemitsatfu ngemuva kwaloko, Litiko Lemfundvo Lesisekelo lakhe futsi letfula tikelwa letingetulu kwaleti-100 kulo lonkhe lelive.

Indvuna Yemfundvo Lesisekelo Angie Motshekga usandza kuvula sikolwa se-99 lesabhidlitwa sabuye sakhiwa kabusha

eRiverton eNshonalanga Kapa.

Kuvula sikolwa semabanga laphansi i-Valhalla Primary School, Indvuna itsite, akukabi nje ligcatsi kuphela, kepha kube yintfo lenkhulu kakhulu njengobe kutawenta indzawo lekahle yokufundzisa nekufundza yabothishela nebafundzi kulesikolwa.

“Lesitakuletsa kulomango, sakhivonchanti lesingasetjentiselwa tintfo letinyenti, bangasisebentisa njengelihhola lemmango kute kutsi kube nebudlelwane lobuhle emkhatsini wesikolwa nemmango. Kusho kutsi siletsa sisetjentiswa lesinenzuzo kulomango.

“Kutsi, sisetjentiswa lesinenzuzo lesisiletsa kulomango. Sisakhivonchanti semphilo yonkhe lesakha simondzawo lesikahle sekusebenta nekufundza sebanfwana betfu lesinato tonkhe tisetjentiswa letidzizingekako kulesikolwa,” kwasho yena.

Lokuvulwa kwalesikolwa kube yincenye ya-R8,2 wetigidzigidzi teMtamo Wekwetfula Takhiwonchanti Tetikelwa Lowandzisiwe (i-ASIDI).

I-ASIDI iluhlelo lwelubanjiswano

Iwemkhakha lotimele newahulumende lohlose kwakha kabusha tikelwa lebetingakakheki kahle leticishe tibe nge-510 kulo lonkhe lelive.

Sikolwa semabanga laphansi lesakhiwa nga-1980, i-Valhalla Primary School sabhidlitwa sacalwa kabusha ngetindleko letinge-R34 tetigidzi.

Phambilini lesikolwa besinebafundzi labange-600 nga-2006, manje sesinebafundzi laba-1 047 emaklasini lange-32, lekutsi futsi manje sesitigcabha ngemtapolwati nelabhorethri yesayensi.

Kutawakhiwa libala lekudlalela libhola letinyawo lapho bekwakhiwe khona lesakhiwo lesidzala.

Andrew Lochner, thishelanhloko walesikolwa, utsi lekubukeka lokusha kutawukhuphula lizinga lekufundza.

“Kusinike lelo tsemba lekwakha likusasa lelincono futsi ngingasho kutsi njengobe sise-Elsies River akusho kutsi sifanele semukele intfo lengekho ezingeni lelifanele.

“Sidzinga kutjela bafundzi futsi sikhombise bafundzi kutsi sidzinga kukhuphula

lizinga sibuye futsi sakhele etukwelikusasa lelincono,” kwasho yena.

Wengete ngelekutsi lesikolwa siligcabho lalomango, nekutsi futsi tiyamjabulisa tindzaba tekutsi sikolwa sakhe singulesinye sencenye yeluhlelo lwe-ASIDI.

“Sitawufundzisa bafundzi betfu futsi setsembe kutsi batasijabulela lesakhiwo nekutsi sitawubaphakamisa njengebafundzi. Bafanele kutsi bangalindzeli intfo kutsi yenteke. Bafanele kutsi bafike lapho khona batawutsi ‘Ngitawenta yami incenye kute kutsi ngente tintfo tetenteke,’” kwasho Lochner.

KuMabasa walomnyaka, litiko futsi letfule sikolwa se-100 eKroonstad eFreyistata njengencenye yeluhlelo lwe-ASIDI.

Lesikolwa setsiwe ligama ngaDorrington Matsepe, babe weNdvuna Yetekuchumana leseayashona, Dkt Ivy Matsepe-Casaburri.

Sakhiwa nga-1992 futsi sacala ngebafundzi labange-500 nebafundzisi laba-15 – lamuhla lesikolwa sinebafundzi laba-1 100.

Linyenti lebanfwana kulesikolwa batintsandzane, kepha nanome nje kunaletinsayeya leti, lesikolwa senta kahle kakukhulu kuTinhloko Tavelonkhe Temnyaka (i-ANA). Kulomnyaka lophelile, sitfole litfusi etibalweni (kusukela kulange-60% kwaya kulange- 69%) saphindze futsi saba ngulesinye setikelwa letiphuma embili letinge-50 kulesifundza.

EMACINISO LASHESHAKO

Tikelwa leti-106 ticedvwe kwakhiwa kute kube ngumanje:

- Letinge-84 eMphumalanga Kapa
- Leti-11 eNshonalanga Kapa
- Le-4 eMpumalanga naseFreyistata
- Le-2 eLimpopo
- Sinye eNyakafu Kapa

Emanti: tikelwa leti-318 setiffole emanti kwekucala ngca.

- Kutfutwa kwendle: tikelwa leti-351 setitfutselwa indle ngalokunesitfuntit kwekucala ngca.
- Gezi: tikelwa leti-279 setichunyelwe gezi kwekucala ngca.



Indvuna Angie Motshekga neLisekela Lendvuna Enver Surty babeka emabalengwe etinhlelo telitiko tekwenza kancono imfundvo kulelive kuluhlelo lwamabonakudze i-The New Age.

Ichubeka isukela elikhasini le-1

kwawo akulawulwa. Esikhatsini lesinyenti, ema-NGO akhuluma ngco nabothishelanhloko betikelwa letizuzako ngaphandle kwekubandzakanya kanye nekwasita litiko,” kwasho Indvuna Motshekga.

“Kungako-ke Umkhandlu Wetindvuna Tetemfundvo wakhipha umyalelo, ngeNgci 2014, kucinisekisa kuchunyaniswa lokuncono kwekusebentisana lokusezingeni lelisetulu lekuzuzwa. Sikhwama Selubanjiswano Setemfundvo Savelonkhe (i-NECT) sitawudlala indzima lenkhulu ekuchumaniseni lobudlelwane,” kwasho yena.

Tinhlangano letifanana ne-TeachSA nato titawudlala indzima lebalulekile ekwakheni luhlelo lekuniketa bothishela, kusebentisa nekutfufukisa kute kwentiwe kancono kusebenta kwemfundzi, nekuhlanganyela nekusebenta ku-MST.

Umhlangano we-MST nawo uhlose kwenta kutsi kubekhona inkhundla yekwabelana ngelwati nekucinisa kubambisana nekusebentisana nema-NGO.

Umhlangano we-MST wesitsatfu uncume:

- Kucinisa Lisukuhlela Lwe-MST Lwavelonkhe.
- Kunyusa linani lebanfwana labafundza tifundvo te-MST kanye nelizinga labo

lemphumelelo kuleti tifundvo te-MST.

- Kuniketa luhlakamsebeni lwekutsi tihlangano temmango netangasese ticondzise imitfombolusito etikolweni ngekubambisana ne-NECT.

- Kuniketa luhlelo lolukhulu lwekuniketa bothishela, kusetjentiswa nekwenziwa kwetinhlelo te-MST ngekubambisana ne-TeachSA.

- Kubona tindlela letehlukene tekusebentisa ithexhinoloji yelwati lwetekuchumana (i-ICT) kufukula kuhlanganyela nesivinini sekuphumela kwetikelwa.

KUSEBENTISA I-ICT KUZUZISA TIKOLWA

I-ICT nayo yindzawo litiko leligcile kuyo kakhulu, ikakhulu etikolweni tasemaphandleni, letenta lange-25% ato tonkhe tikelwa letikulelive.

I-DBE isenchubeni yekuvala letinye tetikelwa letincane, tikelwa letisemaphandleni lengeke isebente kuto; yesekele leto letisebentako kuto futsi yetfule i-ICT kuleto lapho khona kuba nemabanga lamanyenti angeke kugwenywe.

“Lisu lelumikhakhamitsatfu,” kwasho Indvuna Motshekga.

Lisekela Lendvuna Surty utsite litiko lisebentisana nematiko etifundza kwenta siciniseko sekutsi tigodzi tetemfundvo tichutjwa yidatha.

“Manje sesiyati kutsi umfundzi ngamunye usebenta kanjani mayelana nekwati kubhala nekufundza nekubala, futsi sesiyakwati nekukala kusebenta. Sesibhalise bafundzi labangetulu kwalabatigidzi leti-10,8 kulechubo futsi inhloso kutsi sibe neluhlu lolufananako lwemfundzi ngamunye kulelive ekupheleni kwemnyaka. Loku kutawusita

tigodzi kutsi titsatse tincumo letifanele, le-tesekelwa bufakazi.”

Phambilini, eMpumalanga Kapa, tingaphansi kwala-18% tikelwa lebetichunyiwe mayelana ne-ICT futsi betingakhoni kusebentisa Inchubo Yekuphatsa Yetikelwa taseNingizimu Afrika.

“Lamuhla, tingetulu kwalange-92% tikelwa letichunyiwe kantsi futsi nedatha itfolakala kalula,” kwasho Lisekela Lendvuna Surty.

Tindvuna tetifundza (ema-MEC) tetemfundvo letinyenti nato betikhona kuLuhlelo lwamabonakudze lwasekuseni lwe-The New Age. I-MEC Yetemfundvo yaseGauteng Panyaza Lesufi ucele batali kutsi “babe tinsika tetikelwa tetfu futsi bahlanganyele kumitimba lephetse sikolwa”.

“Kutikhetsela kukuwe. “Kukuwe kutsi ukhetsani. Tente kutsi ube khona,” kwasho yena.

I-MEC Yetemfundvo yaseMpumalanga Reginah Mhaule ukhulume ngendlela sifundza sisebentisana ngayo netigodzi kucinisekisa imfundvo lesezingeni lelifanele kulesifundza.

“Siyativala tikelwa tasemapulazini, leto lekungakhonakali kutsi kuchutjekwe nato futsi atinamabanga lamanyenti, kepha hhayi tonkhe njengobe loku sitakuzuzwa eminyakeni leminyenti letako. Sesakhe tikelwa tekubhoda letisihlanu, letine tato setivele tivuliwe futsi kute kube ngumanje sesivale tikelwa letingetulu kwalange-20.”

Nangaphandle kwekutimisela kweNdvuna Motshekga nabo-MEC bakhe kwenta kancono lizinga letemfundvo etikolweni taseNingizimu Afrika, bayavuma kutsi imfundvo iludzaba lwemmango.

“Batali banenzima labayidlalako lebaluleke kakhulu yekwesekela temfundvo kute kuzuze bonkhe banfwana balelive.”



TEMPHILO

Hulumende ulwa ne-TB

Bathandwa Mbola

Hulumende sewetfule umkhankhaso weminyaka lemitsatfu wekuhlolwa sifo semaphaphu (i-TB) kwebantfu labanyenti lokutawusita kunciphisa kusuleleka lokusha nekufa lokuphatselene nayo.

Lisekela LaMengameli Cyril Ramaphosa neNdvuna Yetemphilo Dkt Aaron Motsoaledi bacalise lomkhankhaso eNyakatfo Nshonalanga njengence-nye yeLusuku Lwemhlaba Iwe-TB lolugujwa ngeNdlovulenkulu mhla tinge-24.

INingizimu Afrika yesitsatfu eluhlwini lwe-mave latsintseke kakhulu emhlabeni. Lesifo siyachubeka nekuba ngumbulali lophuma embili kulelive nanome nje selapheka futsi sivileleka.

Sibulala bantfu laba-120 000 ngemnyaka. Hulumende ufuna kunciphisa lelinani libe ngaphansi kwe-20 000.

Njengence-nye yalomkhankhaso, hulumende utawugcila kumacembu ebantfu labasengotini kakhulu yekungenwa yi-TB. Lamacembu afaka ekhatsi tiboshwa emajele, bavukuti labasebanta etimayini, imimango lesetindzaweni letinetimayini kanye nebantfwana, ikakhulu labangaphansi kweminyaka lesihlanu budzala.

“Timo tetenhlole netemnotfo letingasikahle etindzaweni lesihlala kuto, ikakhulu tindlu letingasikahle nekungabi nekudla lokwenele, kwenta indzawo lekahle kakhulu yeku-bhebhetsela tifo letifanana ne-TB, bantfwana kuba ngubo labasengotini kakhulu,” kwasho Lisekela LaMengameli Ramaphosa nakwefulwa lomkhankhaso.

Lisekela LaMengameli litsite Tindhlelo Tekutfufukiswa Kwebantfwana Basebancane (i-ECD) tingasita kunciphisa kwesuleleka kwebantfwana tiphindze tisite labo labasulelekile kutsi babonakale masinyane.

Hulumende uphindze futsi wakhomba tigo-dzi letisitfupha letifanele kutsi tibekwe embili kulomkhankhaso wekuhlolwa. Letindzawo



Lisekela LaMengameli Cyril Ramaphosa ubukisisa umshini wekuhlolwa i-TB. Tisebenti tetemphilo letingetulu kwe-200 seticecshwe mayelana nemitsi ye-TB legwamela imitsi.

yiLejweleputswa eFreyistata, eNshonalanga Randi eGauteng, Sekhukhune ne-Waterberg eLimpopo neBojanala ne-Dr Kenneth Kaunda eNyakatfo Nshonalanga.

Lokuhlolwa kutawentiwa ngetigaba. Emnyakeni wekucala wemkhankhaso weminyaka lemitsatfu, Lisekela LaMengameli Ramaphosa utsite hulumende utawuhlola lokungenani tiboshwa leti-135 000 emajele kanye nebvukuti basetimayini labangefika ehafini yesigidzi.

“Kuletigodzi letisitfupha sihlose kuhlola bantfu labatigodzi letisihlanu nebantfwana labasigidzi le-1,2 etikolweni, etikhungweni tema-ECD nasetinkhulisa.”

Hulumende sewuvele uhlole tiboshwa leti-59 000.

Lelinani lilinganiselwa kukunye kulokutsatfu tiboshwa lesetigwetjiwe nalabo labasamele kugwetjiwa.

Luluhlelo luhamba kahle lufuna kuhlola letinge-90% ngeNdlovulenkulu 2017,” kwasho Lisekela LaMengameli.

Luluhlelo seluvele uhlole bantfu laba-140 000 kuletigodzi letisitfupha.

Timayini setibeke bahloli labayimfisa kutsi basite Litiko Letemphilo bengamele kuniketwa tinsita te-TB.

Emnyakeni wesibili walomkhankhaso wekuhlolwa, kutawuba nekugcila lokwenge-tiwe kumikhandlu yemadolobha lamakhulu.

Emnyakeni wesitsatfu, hulumende utawengeta eluhlwini lwakhe letifundza, Imphumalanga Kapa, iGauteng, KwaZulu-Natal kanye neNshonalanga Kapa.

Kute kucinisekiswa kutsi tigulane te-TB lete-lashwako tiyanatsa futsi ticedze yonkhe imitsi yato letincunyelwe yona tisebenti tetemphilo, hulumende utawucala luhlelo lwekutfungatsa tigulane lesetilahlakile eluhlelweni lwato lwetekwelashwa kanye neminingwane yekutsintsana yetigulane te-TB letatiwako.

Kuphindze futsi kwacecshwa nemanesi lange-200 kutsi acale anike tigulane te-TB legwamela imitsi, etindzaweni letitimele.

Kwamanje iNingizimu Afrika ine-298 wa-letindzawo letitimele.

Lisekela LaMengameli litsite kuletsa tinsita dvute nemimango nako kutawuba ngulokunye lokugcilewe kuko ngesikhatsi salomkhankhaso ngobe kuyintfo lenhle kakhulu etigulaneni futsi kuholela kumiphumela yekwelashwa lemihle.

Lomkhankhaso awutikugcila nje kuphela kuhlola nekwelapha i-TB, kwasho yena.

“Sigcile futsi nasekunciphiseni kwe-suleleka. Bonkhe bantfu baseNingizimu Afrika bangasita kute kuncishiswe ematfuba ekwesuleleka,” kwasho Lisekela LaMengameli, wengeta ngelekutsi kuvala nje umlomo wakho nawu-khwehlela kungenta umehluko lomkhulu.

Ingati yakho ingenta umehluko

Luphiko Lwengati Lwavelonkhe lwaseNingizimu Afrika

Bantfu labanyenti abacapheli kutsi kunikela ngengati kungenta umehluko lomkhulu etimphilweni talabanye bantfu. Kunikela ngeyuniti yengati yinsita lebaluleke kakhulu naledzingeka kakhulu lengasindzisa timphilo.

Ngekunikela ingati, banikeli basita Luphiko Lwengati Lwavelonkhe lwaseNingizimu Afrika (i-SANBS) kutsi lube nengati leta-wisita nangabe ukhona umuntfu lodzinga kufakwa ingati ngalokuphutfumako.

ENingizimu Afrika kufakwa ingati kwe-nteka njalo nje ngemasekhondi lange-48, lizinga lelincane lemayunithi engati la-810 000 adzingeka njalo ngemnyaka kute kuhlangebetwane netidzingo letikhulu tase-Ningizimu Afrika.

Kufakwa ingati simo setekwelashwa sekusindzisa umphefumulo lokwentelwa kubuyisela ingati lelahleke kumuntfu nakahlindvwa noma ngenca yekulimala kamati. Kufakwa ingati kungabuye futsi kwe-ntiwe nangabe umtimba wakho awukwati kwakha ingati kahle ngenca yekugula.

Kwamanje i-SANBS, inhlango lengeri imali lebukene nekuniketa ingati yebantfu nangabe kukhona lodzinga kufakwa ingati eNingizimu Afrika, inebanikeli labangaphansi kwe-432 000, lokungaphansi kweliphesenti linye lelinani lebantfu bakitsi. Loku kusho kutsi kudzingeka bantfu labanyenti labanganikela ngengati ikakhulu ngobe i-SANBS inceke ngalokuphelele kubanikeli labanikela ingati yabo ngekutsandza kwabo kusita kusindzisa timphilo.

NGUBANI LODZINGA INGATI?

Ingati idzingeka onkhe malanga futsi tinyenti tigulane letidzinga kufakwa ingati njalo ngeliviki kute tiphile. Tigulane letidzinga kufakwa ingati:

- Bomake labopha ngenca yetinkinga tekukhulelwa
- Bantfwana labashoda ingati ngalokwendlulele
- Labatfole tingoti
- Tigulane letihlindziwe naletinamdla-vuza

ANGEKE UKWATI KUNIKELA NGENGATI NANGABE:

- Umfutfo wengati yakho ushayela phansi
- Unehayihayi
- Ima une-ayoni lencane emtimbeni
- Ukhulelwe
- Usandza kuhlindvwa.

INGABE TIKHONA TINGOTI LETIKHONA?

Kute tingoti letikhona nawunikela ngengati. Uhlalwa emnweni utsatfwe ingati kuhlolwe kutsi i-ayoni emtimbeni wakho iselizingeni lelifanele yini kutsi unganikela ngengati.

Tintfo letisetjentiswa nawunikela ngengati kufaka ekhatsi inyalitsi yemjovo, tikhwama tengati, emashubhu, nenyalitsi lohlatjwa ngayo emnweni kusha, kususwe emagciwane futsi kuyalahlwa. Ngemuva kwekusetjentiswa kulahlwa emgconyeni wetibi lokhetsekile.

Bantfu labahlanganyela etindleleni tekuphila letingakaphephi njengekuya emacasini ngalokungakavikeleki, kuya emacasini kwalomdvuna nalomunye umuntfu lomdvuna ngalokungakavikeleki noma labasebentisa tidzakamiva labatjova ngato bayalwa kutsi banganikeli ngengati.

TICAPHELISO TANGEMBI KWEKUNIKELA NGENGATI:

- Dlani kudla lokunemsoco lokungenani emahora lamane ngembi kwekunikela ngengati
- Hlola kutsi ingabe ufanele yini kunikela ngengati

TICAPHELISO TANGEMUVA KWEKUNIKELA NGENGATI:

- Dlani kudla lokunemphilo kute ukhuphule lizinga lakho lemanti emtimbeni emahora lamane kuya kulasitfupha:
- Ungabhemi lokungenani kute kube imizuzu lenge-30
- Ungaphakamisa tintfo letisindzako ngalomkhono bewudvoswa kuwo ingati, lokungenani emahora lamabili.

I-‘Hayihayi’: Mabulalabindzile

Sikimu Setekwelashwa tisebenti Tahulumende

Bantfu labanyenti labane-hayihayi bavamise kungati kutsi banalesifo.

Ihayihayi, lephatsa ngetulu kwemuntfu munye lomdzala kulabatsatfu emhlabeni wonkhe futsi ngobe emanani ekufa lacishe abe ngulange-50% awo onkhe emanani kufa lokubangwa sifo sekutfwebuleka kwemtimba nekugula kwenhltiyo, ngekuya kweNhlango Ye-temphilo Yemhlaba.

“Ihayihayi ngulapho khona umfutfo wengati losemitsanjeni yakho yengati uhlala njalo usetulu. Isisifo lesivamile kakhulu... akusibo nje kuphela bantfu labacinelene, labacobeke umtimba labaphatfwa ngulesifo,” kusho Dkt Stan Moloabi, Sisebenti Lesikhulu: Lesiphetse Tekunakekelwa Ngetemphilo kuSikimu Setekwelashwa tisebenti Tahulumende (i-GEMS).

“Bantfu bangaba nehayihayi iminyaka leminyenti babe bangati, lokwenta kutsi-ke ibe isifo lesiyingoti.”

Lusuku Lwehayihayi Lwemhlaba lugujwa njalo mhla ti-17 Inkhwekhweti futsi tindhlangano tetemphilo nabohulumende basebentisa lolusuku kucaphelisa bantfu

ngalesifo.

Lesifo singaphindze futsi sibangele kwehluleka kwetinsoko kusebenta, sifo semehlolo kanye nesifo sekukhohlwa.

INGATI: LUKHESHE TI LOBALULEKILE ENHLITIWENI YAKHO

Ngaso sonkhe sikhatsi inhlitiyo yakho nayishaya, kuchaza Dkt Moloabi, ingati ipompeka iye emtimbeni wakho ihamba ngemitsambo. Ihayihayi ngemandla engati lefuca imitsambo yakho.

“Lamandla ekufuca abalulekile ngobe ingati yakho ifanele kutsi iyise i-okisijini nemsoco emtimbeni wakho wonkhe. Nanome kunjalo, nangabe lomfutfo mkhulu kakhulu, inhlitiyo ifanele kutsi-ke nayo ishaye kakhulu, lokukungabese-ke kubangela kutsi imitsambo yengati ilimale kubuye futsi kubange tinkinga tetemphilo.”

Tinyenti tintfo letingaba nemtselela lomubi kusindzetelo sengati.

“Usengotini lenkhulu yekuba nehayihayi nangebe ungumuntfu lomdzala, ngobe imitsambo yakho yengati iya ngekucina ngesikhatsi uguga, nangabe futsi emndenini wakini kunebantfu labanehayihayi.

“Nanome kunjalo, nanome nje kute longakwenta mayelana naleti tintfo imbili, tikhona tintfo letihambelana nendlela lotiphetse ngayo imphilo yakho longakhona kutilawula. Leti tifaka ekhatsi tintfo letifanana nesisindvo sakho semtimba, kudla

lokudlako nekubhema kanye nekudla luswayi nekunatsa tjwala.”

YATI TINOMBOLO TAKHO

Dkt Moloabi ugqizelela kutsi kubalulekile kwenta luhlolo lwehayihayi.

“Ufanele kutsi uvakashele dokotela wakho njalo ngemnyaka noma lemibili uyokwenta luhlolo lwehayihayi, kute kutsi wente siciniseko sekutsi ihayihayi yakho isezingeni lelifanele, leku-120 ku-80.”

Nanome kunjalo, Dkt Moloabi nangabe unesifo sashukela, sifo senhlitiyo, tinkinga tetinsoko noma nangabe lizinga lehayihayi yakho laphambilini belingetulu kwe-120 ku-80, kufanele kutsi uhlolwe ihayihayi lokungenani kanye ngemnyaka.

UYELAPHA FUTSI UYIVIKELE KANJANI IHAYIHAYI

Nanome nje akhona emakhambi ekwelapha ihayihayi, tingucuko kulendlela lotiphetse ngayo letilula tingasita kuvimba ihayihayi:

- Nciphisa luswayi loludlako
- Tivocavoce njalo nje
- Dlani kudla lokunemphilo
- Bani nesisindvo semtimba lesifanelekile.
- Unganatsi kakhulu tjwala
- Ungabhemi
- Yehlisa emazinga akho ekucinelana kwemtimba